

ADAT ISTIADAT MELANTIK DAN MENJEMPUT PULANG DATUK LEMBAGA LUAK REMBAU

Oleh: Tok Puteh Hj. Ramly bin Hj. Shamsudin

Proses Perlantikan Penyandang Pusaka Adat

Bertitik-tolak daripada asas pentadbiran adat kerajaan Rembau yang rata-rata masyarakatnya hidup bersuku-sakat, maka termetrilah perbilangan:

Alam beraja,
Luak berpenghulu,
Suku bertua,
Anak buah beribu bapa,
Orang semenda bertempat semenda,
Dagang bertempat,
Perahu bertambatan.

Satu tradisi masyarakat pengamal Adat Perpatih di Negeri Sembilan khususnya Rembau, apabila berlakunya kematian, pemecatan atau perletakan jawatan bagi seseorang yang menyandang tali pusaka adat maka secara spontan ahli-ahli suku mengalih pandangan mencari pengganti. 'Proses mencari benih' pengganti ini berlaku dalam satu majlis istiadat rasmi yang dinamakan kerapatan anak-anak buah suku. Ahli-ahli yang menyertai suku daripada setiap perut, ruang dan rumpun diseru supaya menghadiri kerapatan tersebut di tanah pusaka suku. Tanah pusaka tersebut berlainan situasinya bagi setiap suku. Tanah pusaka ini boleh jadi rumah ibu soko, masjid, surau, tanah lapang atau di rumah datuk lembaga sendiri.

Adat mensyaratkan agar kerapatan dihadiri oleh lembaga, buapak dan besar lingkungan sebagai tunggak meneraju usaha mencari kebulatan persetujuan anak-anak buah dan ibu soko. Rumusan hasil daripada permuafakatan dan penemuan itulah diperolehi 'benih' atau 'batang tubuh' yang akan dipersembahkan kepada ketua suku sebagai mengambil-alih gelaran pusaka adat yang kosong itu.

Kepada ketua sukulah sah batalnya perlantikan yang dibuat itu. Waris suku terikat dengan perbilangan:

Ke laut mengikut alur,
Ke darat mengikut benar,
Bertemu benar jangan ditidakkan.

Berbanding dengan zaman sekarang, terdapat kelainan dalam perkara melantik pengganti, kekosongan jawatan pusaka adat (undang/lembaga) mereka yang terpilih melalui perut hasil kebulatan di suatu kerapatan anak buah waris terpaksa mengikut proses ujian lisan dan bertulis yang dikendalikan oleh datuk lembaga tiang balai, dan orang besar undang sebagai penyelaras. Calon yang memperoleh markah yang tinggi dan berwibawa akan diumumkan sebagai penyandang baru gelaran pusaka adat yang kosong.

Keputusan pemilihan adalah muktamad walaupun ada ekoran rasa tidak puas hati daripada pihak waris yang lain. Keputusan itu tetap bersandarkan perbilangan:

Biar mati anak
Jangan mati adat.
Dianjak layu
Dicabut mati.

Pihak pembuat keputusan akan menggunakan bidang kuasanya seperti yang termaktub dalam perbilangan:

Tali pengikat daripada Lembaga
Keris penyalang daripada Undang
Pedang pemancung daripada keadilan.

Setelah pengisytiharan pengisian berlalu, maka proses 'menambang adat' pun dilaksanakan di rumah telapak suku individu berkenaan. Adat

menambang pusaka ini dilakukan untuk menjelaskan kepada waris suku tentang pantang larang penyandang pusaka dan cara memuliakannya. Dalam olek jamu ini penyembelihan seekor kambing adalah dimestikan. Penyandang pusaka harus menyediakan sumbangan yang disebut bahara untuk diagihkan kepada datuk-datuk lembaga yang hadir sebagai pelapik adat.

Untuk melaksanakan istiadat menambang pusaka ini penglibatan anak-anak buah dan waris suku amat diperlukan bagi menyusun atur alat istiadat. Di ruang adat tersedia tabir langit-langit, tilam pandak, tepak sirih (peminangan) dan alat-alat kebesaran datuk lembaga sebagaimana patutnya; selaras dengan kata perbilangn:

Duduk berserta dengan aturan
Kecil bernama muafakat
Besar bernama adat
Gedang bernama pusaka.

Di ruang adat, kelompok waris suku telah berkampung untuk menyaksikan ketua-ketua adat berbilang adat. Tujuan utama berbilang adat itu adalah memperakukan kebesaran, mengenakan dan mengingatkan semula pantang larang pusaka yang disandang agar tidak kecundang sebelum masanya. Ahli-ahli keluarga suku berkenaan merafak sembah, menjunjung kasih dan merakamkan taat setia secara bergilir-gilir. Orang semenda dan tempat semenda termasuk ibu soko tidak terkecuali berbuat demikian. Bah-kan mereka senantiasa berpaut kepada perbilangn:

Ke laut pulau-pulauan,
Ke darat busut-busutan;
Air setitik sama-sama dilautkan,
Tanah sekepal sama-sama digunungkan,
Telur sebiji sama ditatang;
Pusaka satu sama dijunjung.

Pada hari yang sama ataupun keesokan harinya, sebaik sahaja selesai upacara menambang di telapak ibu soko, bagi penyandang pusaka yang baru dilantik maka menjadi kemestian keluarga pihak isteri menjemput pulang ke teratak untuk satu lagi upacara istiadat yang dikenali sebagai 'menambang pusaka'.

Tempat semenda seadat dan orang semenda seresam akan mengatur dan mengepalai rombongan pihak isteri ke telapak tempat pusaka tersebut didirikan. Di ruang adat teratak isteri sedia ada peralatan adat istiadat seperti yang terdapat di telapak penyandang pusaka.

Sebaik sampai, rombongan pihak waris si isteri di ruang adat maka berlakulah pepatah-petitih persimbangan aturan menjemput dengan penuh ketelitian oleh kedua-dua buapak (suku penyandang pusaka dan suku isteri) yang berkenaan.

Rakaman Perbilangan Menjemput Datuk Lembaga Suku Pulang ke Teratak Untuk Mendirikan Adat *Menambang Pusaka*.

Buapak isteri (A):

Sembah datuk.

Di kiri mangkuk di kananpun mangkuk,
Mangkuk mari di tengah rumah,
Di kiri datuk di kananpun datuk,
Datuk yang mana satu nak halakan sembah.

Buapak penyandang pusaka (B)

Sembah datuk.

Pokok bunga tumbuh dilembah,
Burung belatuk hinggap di tingkap;
Datuk bertanya laluan sembah,
Kepada datuk inilah laluan sembah.

Buapak A:

Sembah datuk.

Terbang balam dari seberang,
Hinggap mari di tengah rumah;
Makan sirih sekapur seorang,
Sama-sama kita mengunyah.

Sembah Datuk



*Istiadat menjemput Datuk
Lembaga menambang
pusaka ke teratak isteri*



*Siri taklimat bidang kuasa
dan pantang larang
Lembaga disaksikan oleh
Datuk-datuk Lembaga
Tiang Balai nan Lapan*

Buapak B:

Sembah datuk.

Orang menari mengikut irama,
Ramai orang pergi ke pekan;
Sirih dihulur saya terima,
Suruh makan saya makan.

Buapak A:

Sembah datuk.

Burung belatuk di pohon getah,
Daun kering di atas lantai;

Jemput Tuk makan sirih,
Sirihnya kering pinangnya kotai.

Buapak B:

Sembah datuk.

Bukan lebah sebarang lebah,
Lebah bersarang di pohon nangka;
Bukan sembah sebarang sembah,
Sembah saya berserta adat dan pusaka.

Sembah datuk.

Buapak A:

Sembah datuk.

Terbang meranti tiga batang,
Tebang mari tiga muka;
Yang dinanti sudah datang,
Ada kata nak dibuka.

Buapak B:

Sembah datuk.

Pokok pauh di tengah padang,
Bersama langsung dan meranti;
Dari jauh datang datang,
Apa hajat datang ke telapak kami.

Buapak A:

Beginilah tok. .

Saya ni orang semenda di tempat semenda.
Adat orang semenda di tempat semenda:
Disuruh pergi dipanggil datang;
Umpama parit rentang pagar pada tempat semenda:
Kok lemah melapis,
Kok condong menupang;
Menjunjung kata tempat semenda.

Jadi:

Pada hari yang sehari ini,
Sampailah saya ke telapak datuk,
Dengan membawa hajat:
Menjemput orang semenda seresam saya
Bernama
Kini menyandang tali pusaka
Dengan gelaran Datuk
Suku
Untuk pulang ke teratak beliau,
Sekaligus mendirikan istiadat menambang pusaka.

Saya serulah sekalian yang hadir ini untuk sama-sama mencemar diri ke majlis tersebut. Akhir kata, bak kata pantun adat:

Bukan lebah sebarang lebah,
Lebah bersarang di pohon buluh;
Bukan sembah sebarang sembah,
Sembah menyusun jari nan sepuluh.

Sembah datuk.

Buapak B:

Sembah datuk.

Beginilah Tuk.

Saya bagi pihak batang tubuh penyandang pusaka dan anak-anak waris di telapak ini berkenan menyempurnakan hajat besar kedatangan datuk berserta rombongan datuk ke telapak kami. Bak kata orang-orang tua:

Ibarat pinang nak pulang ke tampuk,
Sirih nak pulang ke gagang,
Pusaka nak pulang ke soko.

Sembah datuk.

Glosari

Benih

Individu yang ditunjuk sebagai calon pengganti pejawat jawatan adat.

Berbilang adat

Menggunakan perbilangn semasa menyampaikan sesuatu perkara.

Besar Lingkungan

Orang besar adat yang mentadbir anak buah sukunya dan terbatas kepada ruang yang ditentukan oleh buapak.

Diseru

Dijemput hadir dalam satu kerapatan adat untuk melantik ketua adat yang baharu dan mendapat kata sepakat serta kebulatan waris suku.

Ibu soko

Perempuan yang berumur dan tahu selok-belok adat sebagai mewakili kelompok perempuan dalam sesuatu suku.

Menambang adat

Pemasyhuran gelaran adat yang disandang lelaki dalam satu kerapatan adat waris suku.

Mencari benih

Mencari calon pengganti kepada ketua adat yang telah dipecat, meletak jawatan atau meninggal dunia.

Pelapik adat

Berupa wang pemberian sagu hati yang mengiringi persembahan adat yang diadakan dan menjadi milik buapak.

Penambangan pusaka

Mengisytiharkan gelaran adat yang disandang seseorang lelaki diteratak isteri tempat ia menyemenda.

Ruang adat

Satu tempat khusus untuk upacara serah menyerah yang dilakukan ketua adat dalam majlis pertunangan atau perkahwinan.

Tali pusaka

Gelaran pusaka adat hak perempuan yang disandang lelaki pengamal Adat Perpatih.

Tanah pusaka suku

Tanah adat kepunyaan suku yang tidak boleh ditukar milik kepada suku lain.

Telapak

Rumah kediaman di mana seseorang itu dilahirkan.

Tua suku

Lelaki yanga tertua dan disegani di kalangan tempat semenda seadat. Adakalanya ketua adat juga disebut 'tua suku'.

Waris suku

Jurai keturunan daripada nenek moyang yang satu bagi kelompok sesuatu suku.

BIBLIOGRAFI

Norhalim Hj. Ibrahim. *Perkahwinan Adat Di Negeri Sembilan*. Shah Alam: Penerbitan Fajar Bakti. 1996.